



## ***Komunikadu Imprensa***

*25 Juñu 2013*

### **Ministériu Públiku alega tinan 20 prizaun ba arguidu krime omísidiu agravadu natureza violénsia doméstika**

Iha 21 Juñu 2013 Tribunál Distritál Díli halo julgamentu ba kazu omísidiu agravadu ho natureza violénsia doméstika ho ofensas simples ba arguidu ho inisial ASL ne'ebé prátika krime hasoru nia kónjuje RS iha areia Tasitolu, Dili.

Ministériu Públiku akuza katak iha 29 Janeiru 2013, arguidu diskuti-malu ho lezada bainhira lezada fila husi Taibesi no lezada basa dala ida iha arguidu nia hasan sorin los. Hafoin lezada tama ba kuartu laran, arguidu tuir ba dudu lezada monu ba rai, buti iha kakorok no ho tudik sona iha lezada nia hirus matan to mate kedas.

Depois arguidu lori boraixa metan kesi lezada nia isin lolon hatama ba iha plastiku metan ida no hatama ba iha kama okos. Arguidu telefone ba PL katak nia oho mate tiha nia fen ona. Arguidu ba kedas Taibesi foti fali saku mutin no fila fali ho PL no nia hatama lezada nia isin mate ba iha saku laran no tula iha motor PL nian no sira nain rua ba soe iha tasiibun pertensi ba Metiaut iha dadersan madrugada.

Kazu ne'e akontese tanba antes ne'e iha 28 Janeriu 2013, lezada ba iha Taibesi sein koñesimentu husi arguidu hanesan nia kaben. Arguidu deskonfia katak lezada mete ho mane seluk (selingkuh-amante) ho mane seluk.

*"JSMP enkozara Tribunál atu konsidera alegasaun Ministériu Públiku ne'ebé alega tinan 20 prizaun ba arguidu tanba aktu ne'e nu'udar forma violénsia doméstika ne'ebé grave teb-tebes husi forma violénsia sira seluk iha Kódigu Penál "* dehan Diretór Ezekutivu JSMP Luis de Oliveira Sampaio.

Ministériu Públiku akuza arguidu kontra artigu 139 kona-ba omísidiu agravadu Kódigu Penál konjuga ho artigu 35 Lei Nú. 7/2010 Lei Kontra Violénsia Doméstika.

Iha alegasaun final, Ministériu Públiku husu ba tribunál atu kondena arguidu ho pena prizaun tinan 20. Defeza husu ba tribunál atu hamenus pena ne'ebé Ministeriu Públiku alega.

Kazu ne'e rejista iha tribunál Distritál Dili ho Númeru Prosesu: 106/2013/TDD. Julgamentu prezide husi Dr. Antonio Helder Viana do Carmo, Julio Gantes no Jumiati Freitas Juis estajjaria, Ministériu Públiku representa husi Dra. Angelina Saldanha no arguidu hetan defeza husi Dra. Olga Bareto husi Eskritoriu Defensór Públiku. Ofisiál Justisa ne'ebé responsavel iha prosesu mak Sr. Julio Ribeiro.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMP.tl